

清孝外史精

卷二十九 五 十 五 十

通志卷之五

通志卷之五

清季外交史料

附索引及西巡大事記



中華民國二十一年一月

總發行 王希隱

北平迺茲府關東甸七號

版權所有 翻印必究

清季外交史料卷二十九

光緒八年八月至九月

目錄

科布多辦事大臣清安額爾慶額等奏科布多邊界復行勘分困難

情形摺附廷寄八月初三日

諭劉長佑等法人擬據北圻着相機因應八月十一日

北洋大臣李鴻章等奏究問朝鮮亂首李昱應情形摺八月初十日

北洋大臣李鴻章等奏朝鮮派員籌商善後片

附咨文及上諭各二件八月十二日

總署奏遵議發給洋人游歷內地護照請仍照舊章片八月二十日

北洋大臣李鴻章奏朝鮮與日本續訂約款摺附條約八月二十四日

北洋大臣李鴻章奏妥議朝鮮通商章程摺附章程九月初一日

北洋大臣李鴻章奏自強要圖宜先練水師再圖東征摺 九月初二日

桂撫倪文蔚奏防軍到越布置情形摺 九月初八日

桂撫倪文蔚奏法人增調師船脅越片 附上諭 九月初八日

總署奏議覆朝鮮通商章程摺 九月十二日

總署奏議覆中外稅釐各事摺 九月十二日

清季外交史料卷二十九

黃巖弢夫王彥威輯

男希隱亮編

孫孝章敬立校

科布多辦事大臣清安額爾慶額等奏科布多邊界復

行勘分困難情形摺

附廷寄

科布多辦事大臣清安額爾慶額奏爲復行勘分科境邊界蒙哈各民無地安身衆心惶惶誠恐滋生事端謹將急迫情形披瀝上陳事竊於本年六月間迭據烏梁海左翼散秩大臣巴圖莽乃稟稱緣職地處邊疆異常瘠苦蒙民自遭獮逆蹂躪以來元氣未復連年瘟疫災及牲畜

不可勝計至舊有游牧前已盡被俄人分割此時僅止烏梁海所屬之哈巴河阿勒臺山一帶就牧而復有哈薩克人衆無地安身全行擁擠於本游牧蒙民正在不能謀生之際今聞俄人又欲改分地界若將哈巴河再行允許分讓不惟哈夷無處容身即蒙民必無活命之日俯念衆民隨地劃歸俄轄雖死不從況職世受國恩亦稍知大義而背順從逆決不忍爲現在本游牧男婦老幼終日號泣哀痛之聲達乎徧野似此情迫懇請酌度辦理各等情稟請前來奴才等披閱稟牘見其言詞哀切俱係實在情形深爲可憫即飛飭該散秩大臣好爲撫慰毋令驚惶以安衆心然分疆定界關繫重大斷非邊臣所敢專也前於五月間將境內萬難分讓情形業經奏明在案俟奉到諭旨應如何辦理之處

再行酌度當經批飭去後適於七月初五日接准伊犁將軍金順咨開西北邊界另選大員前往勘分請旨飭下科布多辦事大臣額爾慶額就近會同俄官將薩烏爾嶺奎峒等山邊界詳細履勘照約畫分以昭妥協並鈔稿咨會前來續於七月初八日復准該將軍咨送圖約及期訂於七月十五日馳赴滿圖會同俄官舉辦分界事宜先後咨會前來奴才等接閱之下亟應商派奴才額爾慶額束裝就道星馳前往舉辦勘分事宜無如前據烏梁海左翼散秩大臣巴圖莽乃所稟各情形隨即派員星馳往查旋據稟稱該游牧衆民現聞復又勘分該處地界竟有至死不肯分讓之語到處人情洶洶只得據實稟明前來奴才等詳加商酌倘至該處與俄官劃分之際衆民堅不肯讓必致釀成事端故

未敢冒昧從事不得不先行縷晰陳之科界早經前烏里雅蘇臺將軍明誼並前科布多參贊大臣奎昌已將科地分讓至十分之六其分讓之處本屬沃壤盡被俄人割去以致哈夷無所棲止均擁擠於蒙古烏梁海之哈巴河等處就牧現在無地安插此其明證也案查前准總理衙門咨送新約之內並無科城名目且數年前既定之界均皆建立牌博永遠遵行在案豈復另有勘改之舉至本年四月間俄人輒率馬步數百之衆盤據哈巴河各情形業經五月二十四日具奏在案今伊犁將軍金順咨寄圖約前來奴才細查圖內奎峒山黑伊爾特什河薩烏爾嶺等處形勢與積年新舊圖說詳加覈對並無此項名色或係俄人語音錯訛之所致抑或俄人暗藏陰謀故不肯實指其名有意含混均

不可解據奴才等按照圖約大致形勢比較其名曰奎峒山者或係科屬烏梁海之阿勒臺山耶查阿勒臺山形勢巍然鎮壓西北與五嶽相埒其間樹木林立出產甚多綿亘數千里地當險峻實爲科城保障又爲塔城屏蔽故俄人注意於此匪伊朝夕現在按圖勘改應於此山自何段畫線勘分又不指實其名足見捏造名色巧爲含混意圖據高臨下扼我要隘預爲將來負隅抗拒地步又名曰黑伊爾特什河者或係科屬額爾吉斯河耶查此河乃爲水路上游順流而下徑逼俄疆直達黑龍江彼所慮者恐我建設戰艦爲王濬樓船之勢今若佔去彼必以爲運道較陸路更爲便捷一有緩急則援兵可以衝波而至又名薩烏爾嶺者或係塔屬之霍博克賽哩山耶查此山爲塔城門戶與科界唇

齒相依其地最關緊要今若分讓不惟科塔二城聲息隔絕定必有覬覦瑪納斯古城之勢意欲聯絡吐魯番與南八城首尾相應即伊犁烏魯木齊之東路亦必斷矣況哈巴河及布倫托海一入穀中俄人遂可就地開墾屯兵屯糧無往不利假使修鐵路以駕火車造船楫而通水道邊疆四通八達任其縱橫則俄之聲勢必不可遏今若按照圖約勘改所失雖小而貽害最大尙望我皇太后皇上勿以奴才等今日之言爲張大其詞蓋數萬里邊疆將來大局安危在此一決如昔年臺灣澳門之虞可爲殷鑒況此次所議新約原爲交收伊犁前來分界而設與科城毫無牽連何致復欲勘改殊屬於理不合想科界前經定後俄人周歷各處形勢見此數處實有利於我而不利於彼者故約內轉議勘

改其中若實指其名知我必不相從是以捏造名色巧爲含混已可概見而兩次出使大臣崇厚曾紀澤等雖未嘗親歷邊疆形勢亦當考察輿圖詳加諮詢以重其事祇以爲極邊沙漠一隅之地無關緊要肆行擅許不知彼旣急切要求者在奪我險要以爲扼守之計反致利於彼不利於我也竊念國家現今收回伊犁者原不肯失此疆土以副列聖列祖闢地開疆之至意今若將科境任聽俄人勘改誠恐西北半壁地利失矣且揆烏梁海之蒙民本屬無地安身大有濟河焚舟之勢亦係出於萬不得已倘若定要勘分必致外患未萌內難先起故不敢輕率前往勘分奴才等午夜焦思進退維谷是以不揣冒昧仰懇曲體下情俯念邊民無處安身科境之地萬難分讓各情形亟應請旨迅飭廷臣

妥議具奏無任惶悚待命之至謹奏光緒八年八月初三日奉廷寄據清安額爾慶額奏現在分界若將新約內之奎峒山及科屬之哈巴河等處分入俄界既失地利而蒙民等無地容身恐滋事端等語所奏自係實在情形該處界務崇厚貽誤於前曾紀澤力爭於後既定新約祇可就原圖應行勘分之處力與指辯酌定新界金順等務當懷遵六月二十一日諭旨詳慎商辦無庸另行交議至圖中黃線以西蒙民哈夷約有若干應如何擇地安插籌款撫恤之處並着清安額爾慶額會商金順升泰悉心妥籌具奏惟分界期迫一時恐難就緒應由金順升泰知照俄國分界大臣量議推展以期勘定之後彼此得以相安並由總理衙門照會俄國使臣並知照曾紀澤轉咨辦理

諭劉長佑等法人擬據北圻着相機因應

上諭劉長佑等奏藩司出省察看邊防並布置關外各軍情形覽奏均悉沈壽榕等關外水陸各營業已分布駐紮此次唐炯酌帶小隊出關前赴保勝察看情形由川帶往舊部計日可到着劉長佑岑毓英杜瑞聯飭令該藩司審度機宜妥慎辦理所有在防各將領一體聽候該藩司調遣毋誤事機並與廣西派出各軍聯絡聲勢互爲應援法人意在盡據北圻殊爲叵測着劉長佑酌度情形相機因應劉永福一軍可爲防軍聲援亦應設法籠絡俾爲我用總期豫杜外人窺伺亦不致遽啟衅端如能保護北圻卽以固吾疆圉前據吏部主事唐景崧條陳籌護藩邦事宜已將該員發往雲南交岑毓英差遣矣八月十一日

北洋大臣李鴻章等奏究問朝鮮亂首李昰應情形摺

前大學士署北洋通商大臣李鴻章署理直隸總督兩廣總督張樹聲奏爲遵旨會同究問朝鮮亂首李昰應情形恭摺詳細覆陳事竊臣等節次欽奉諭旨着會同向李昰應究出該國變亂緣由及著名亂黨詳細具奏候旨遵行等因欽此臣等連日遵旨會同傳見李昰應究問該國變亂緣由及著名亂黨語多狡展堅不吐實當將究問及擬議處置各情先行函達總理衙門一面復飭津海關道周馥候選道袁保齡馬建忠等再行詳細根究去後茲據該道等稟稱公同傳詢李昰應反覆詰問據稱癸酉以前昰應輔政十年各營軍兵按月放餉自閔謙鎬執掌財賦近者軍米十餘朔不發六月初間頒下一朔米劣斗小軍兵不

受閔謙鎬不思安撫捉囚濫殺諸軍憤鬧是應聞亂入城挺身曉諭亂軍因殺國相宰臣等三四人詰以伊兄李最應既不管餉又不管兵何以被殺則謂李最應執政數年自失人心當日恐喝軍民以致遇害詰以汝既能定亂當知亂首何人持械先入王宮是何隊兵卒環訴於汝係何姓名則謂初九日軍兵來訴於家幾千百人不知其首圍逼王宮五營咸動不知孰先孰後詰以初九日後汝總持庶務罷機務衙門改武衛營制何以未聞捕治亂黨則謂庶務因國王之託亂黨姓名百方開導絕不供指查朝鮮領選使金允植致周馥書云李是應素日結黨蓄謀圖奪政柄甲戌以來形迹屢著昨年逆魁李載先卽是應之子諸囚供案屢發是應陰謀國王置不欲聞止誅餘黨此次亂起之源由於

是應激變乃自稱國太公總攬國權朝鮮侍讀魚允中致周馥書亦言國政現歸是應亂魁卽是此人金允植又曾與周馥筆談言李是應秉政十年毒虐生民國王年長無意反政舉國不韙閔妃崇用親屬以分其權自是憤毒日增馬建忠與朝鮮吏曹判書趙寧夏筆談據云今王入承國統後李是應總理國事國王欲親政務相持許久國政始出於王王妃亦多與聞至閔謙鎬分給軍餉之日米不滿斛軍士與胥役詰鬪謙鎬拿囚軍五人欲置於法軍人奔訴於是應是應以言激之致變初九日殺謙鎬金輔鉉是應入闕曉諭諸軍卽總庶務各等語李是應所言如彼朝鮮諸臣所述如此參稽質證此次之變發於亂軍而成於是應昭昭在人耳目稟請鑒核等情前來臣等覆加察核該道等所稟